

Sekitar 500 pemimpin masyarakat menyertai acara dialog tertutup Program Mendekati Masyarakat (CEP) Sabtu lalu. Hadirin berkongsi idea dan saranan mengenai usaha memelihara perpaduan sosial dan keharmonian kaum sekiranya berlaku krisis di Singapura. Berikut dilaporkan inti mesej tetamu terhormat, Menteri Undang-Undang merangkap Menteri Kedua Ehwat Dalam Negeri, Encik K. Shanmugam, dalam majlis dialog itu. Berita Harian turut mewawancara Mufti Singapura, Syed Isa Semait, yang merupakan antara peserta dialog itu.

Mufti: Sistem sekular di Singapura disesuaikan bagi iktiraf semua agama

Oleh LINILIDIA ABDUL HAMID

lini@sph.com.sg

TIADA percanggahan antara sistem negara sekular dengan kebebasan mengamalkan agama, kata Mufti Syed Isa Semait.

Beliau menyampaikan pendapatnya itu semasa sesi dialog tertutup di akhir acara Program Mendekati Masyarakat (CEP) yang berlangsung di Orchid Country Club Sabtu lalu.

Acara tersebut dihadiri Menteri Undang-Undang merangkap Menteri Kedua Ehwat Dalam Negeri, Encik K. Shanmugam, sebagai tetamu terhormat dan sekitar 500 pemimpin masyarakat.

Semasa dihubungi kelmarin, Mufti Syed Isa berkata sistem sekular yang diamalkan di Singapura sesuai dengan konteks Singapura yang mempunyai rakyat berbilang bangsa dan agama.

“Semua agama menggalakkan kita untuk saling menghormati dan terbaik-baik antara satu sama lain.

“Namun, setiap agama tentu ingin menyatakan yang agama itu lebih sah daripada agama yang lain. Sistem sekular dapat disesuaikan untuk menghormati semua agama demi menjaga keamanan,” ujar Mufti.

Menurutnya lagi, beliau terdorong memberikan pandangannya itu setelah ada peserta bertanyakan

tentang adakah Singapura mengamalkan sistem sekular sepenuhnya memandangkan ia memberikan (penganut) agama kebebasan beribadah sedangkan sekular membawa makna tiada agama.

“Sistem sekular di Singapura telah disesuaikan untuk mengiktiraf semua agama yang ada supaya masyarakatnya dapat hidup aman damai antara satu sama lain.

“Walaupun ini bermakna sistem yang diamalkan tidak sepenuhnya sekular, ia mengandungi dasar-dasar yang boleh membawa kesejahteraan hidup di Singapura,” ujar Mufti Syed Isa.

Tambahnya lagi, semua orang berhak menyuarakan pandangan.

Tetapi, pandangan yang sudah disuarakan hanyalah setakat pandangan sahaja. Dalam menyampaikan pandangan, seseorang juga harus melihat pandangannya dalam konteks Singapura.

“Apakah sesuatu pendapat atau pandangan itu sesuai untuk Singapura harus diperiksa supaya kita dapat menjaga kestabilan dan keamanan di Singapura. Pandangan yang boleh menggoncangkan keamanan ini harus ditolak,” ujar beliau lagi.

Menurutnya, apa yang dilakukan pemerintah sekarang adalah menjaga keamanan dan keharmonian warga Singapura secara keseluruhannya.

Beliau percaya setiap kritikan yang dilemparkan terhadap sistem itu hanyalah sekadar pandangan yang belum pasti kesesuaiannya.



BERDIRI MENGUTARAKAN PENDAPAT: Mufti Syed Isa Semait turut berkongsi pendapatnya tentang sistem sekular yang berjaya mengekalkan keharmonian masyarakat berbilang kaum dan agama di Singapura. – Foto CEP